

# **Badische Landesbibliothek Karlsruhe**

**Digitale Sammlung der Badischen Landesbibliothek Karlsruhe**

**Ander Buch. Ein New künstlich Lautten Buch, für die  
anfahenden Schuler ...**

**Neusidler, Hans**

**Nürnberg, 1544**

Wir Ferdinand von Gottes genaden

**urn:nbn:de:bsz:31-16232**

# Wir Ferdinand von Gottes genaden

Römischer König/ zu allen zeyten merer des Reichs/ in Germanien/ zu Hungern/ Behem/ Salmacien/ Croacien vnd Sklauonien ꝛ. König Infant in Hispanien/ Erzhertzog zu Osterreich/ Hertzog zu Burgundi/ Steyr/ Berndten Crain vnd Wirtemberg ꝛ. Graue zu Tyrol ꝛ. Bekennen öffentlich mit diesem brief/ vnd thun khundt aller meniglich. Als wir hienor an stat vnd in namen/ der Römischen Kayserlichen Maiestat/ vnsern lieben Bruders vnd Herrn/ vnnsern vnd des Reichs getrewen/ Hanssen Newsidler ain freyheyt gegeben/ das ime in fünff Jarn/ von dato der selben freyheit anzeraiten die Stück zu der Lauten/ vnd der gleichen Saitenspiel gehörig/ so er von erfarnen vnd versienndigen der Musica vberkommen/ vnd zusamen gebracht/ vnd in Druck außgeen lassen/ niemant nachdrucken solle/ vnd vnns aber gedachter Newsidler yetzo berichte/ wie er soliche Stück/ etlichermassen gemet vnd gepessert/ vnd des halben vorbette/ die selben von newem in Druck außgeen zu lassen/ vnd vns darauff dianütiglich angerüffen vnd gebeten hat. Das wir ime obberürte freyheit gnedigklich erstrecken wolten. Des haben wir angesehen/ berürtes Newsidlers zünlich bette/ vnd darumb von hochgedachter Kayserlicher Maiestat wegen/ vnd für vns selbs/ ime dem Newsidler zu gnaden/ auch der Jugend vnd allen Liebhabern dieser kunst zu gutem/ die obbestimt freyheit/ auff Fünff Jar lang/ von dato dits briefs anzeraiten gnedigklich erstreckt. Thuen das auch hiemit wissentlich in Crafft dß briefs. Also das er sich sollicher freyheit/ In maß ime dieselb hienor gegeben/ gebrauchen/ die Stück mit der merung vnd pefferung von Newen in Druck öffentlich außgeen verkauffen vnd vertreiben lassen mag/ vnd sollen ime dieselben in obbestimten Fünff Jarn/ niemands weder heimlich noch öffentlich nach drucken noch auch also nachgedruckt versüß vmbgetragen/ noch verkaufft werden/ in kein weyß noch weg. Vnd gebieten darauff/ in Namen vnd von wegen/ der gedachten Römischen Kayserlichen Maiestat/ allen vnd yeden/ vnsern vnd des Heyligen Reichs/ vnd für vns selbs aller vnser Königreich Fürstenthumb vnd Landen/ Vnterthanen/ Inwohner/ vnd getrewen/ vnd in sonderheit allen Puchtrückern vnd Puchfürern bey einer Peen/ benentlich zehen marck löttigs goldee/ halb in vnser vnd des Heyligen Reichs Chamber/ vnd den andern halben theyl/ obgedachtem Newsidler/ vnablässig zu bezalen/ hiemit ernstlich vnd wöllen/ das sy genante Stück/ in berurten fünff Jarn/ niemands weder heimlich noch öffentlich/ wie vorsehet/ nach drucken/ noch also nachgedruckt/ vmbzetragen oder feyl zu haben gestatten/ solchs auch selbs mit thun/ als li. b einem yeden sey/ hochgedachter Kayserlicher Maiestat/ vnser vnd des Reichs vngnad vnd straff/ vnd dartzu die obbestimpte Peen/ sambt verliering derselben nachgedruckten Stück oder Bücher/ die der gedacht Newsidler/ wo er die ankomen/ zu seinen handen nemen vnd bringen mag/ zu vermeiden/ ongeruede. Das meinen wir ernstlich. Mit verkund ditz briefs der geben ist in vnser/ vnd des Reichs Statt Nürnberg/ den zween vnd zwanzigsten tag Februarij. Anno ꝛc im Drey vnd vierzigsten/ vnserer Reich des Römischen im dreyzehenden/ vnd der andern/ im Sibenzehenden.